



ҚАЗАҚСТАН РЕСПУБЛИКАСЫ БІЛМ
ЖӘНЕ ҒЫЛЫМ МИНИСТРЛІГІ

МИНИСТЕРСТВО ОБРАЗОВАНИЯ И
НАУКИ РЕСПУБЛИКИ КАЗАХСТАН

MINISTRY OF EDUCATION AND SCIENCE
OF THE REPUBLIC OF KAZAKHSTAN

Қазақ мемлекеттік қыздар педагогикалық университеті

Қазақ әдебиеті кафедрасы

Казахский государственный женский педагогический университет

Кафедра казахской литературы

Kazakh State Women's Teacher Training University

The chair of Kazakh Literature

Қазақ мемлекеттік қыздар педагогикалық университетінің 70 жылдығына орай
**«ЗАКИ АХМЕТОВ ЖӘНЕ ҚАЗІРГІ ҚАЗАҚ ӘДЕБИЕТТАНЫНЫҢ
ӨЗЕКТІ МӘСЕЛЕЛЕРІ»**

атты халықаралық ғылыми-теориялық конференция

МАТЕРИАЛДАРЫ

МАТЕРИАЛЫ

Международной научно-теоретической конференции:

**«ЗАКИ АХМЕТОВ И АКТУАЛЬНЫЕ ПРОБЛЕМЫ
СОВРЕМЕННОГО КАЗАХСКОГО ЛИТЕРАТУРОВЕДЕНИЯ»**
посвященной 70-летию Казахского государственного женского
педагогического университета

MATERIALS

Of International Scientific and theoretical conferenceon

**«ZAKI ACHMETOV AND THE MODERN THEORETICAL
PROBLEMS OF KAZAKH LITERATURE STUDIES»**
devoted to 70th Anniversary of the Kazakh State Women teacher training University

Алматы, 2013

АКАДЕМИК ЗЭКИ АХМЕТОВ ТУРАЛЫ СӨЗ

Ж. Дәдебаев

филология гылымдарының

докторы, профессор,

әл-Фараби атындағы КазҰУ

жасанындағы Абай гылыми-зерттеу

институтының директоры

1975 жылы университетті бітірдік. Жас мамандардың болашақ жұмыс орындары анықталды. Мен Қарағанды облысына баратын болдым. Дипломымызды қолға алдық. Енді жолға шығамыз деп жүргенде, университетті өзіммен бірге бітірген бірнеше жас маман жұмысқа Ғылым академиясының М. Әуезов атындағы әдебиет және өнер институтына баратын болғандарын айтты. Анығын білсем, оларды М. Әуезов атындағы әдебиет және өнер институтына жұмысқа алып қалуга профессор Тұрсынбек Қекішев уәде беріпті. Тұрсынбек Қекішев - менің диплом жұмысымның жетекшісі болған кісі, өзі студенттердің ғылыми қоғамына басшылық жасап, мені әдебиеттану тобындағы студенттерге «бастық» етіп қойған. Жаңағы хабарды ести сала, Тұрсынбек агама телефон соқтым. Сәлемдескен соң: «Аға, біздің жігіттердің біразын Әуезов институтына жұмысқа алып қалып жатыр екенсіз, мені де алып қалыңыз!» - дедім. Ағам сөзге келген жоқ: «Онда ертең сағат онда министерствоның алдына кел», - деді. Ертеңіне бес-алты жас маман Тұрсекеннің кел деген жеріне келіп тұрдық. Тұрсекен бізді министрдің орынбасары Әуесхан Қанафин деген кісіге алып барып, біздің облыстарға тарап кеткенімізден ғөрі Әуезов институтында қалғанымыз елге де, ғылымға да пайдалырақ болатынын айтты. Министрдің орынбасары жас мамандарды жұмыс орындарына бөлу туралы бұйрыққа езгеріс енгізіп, біздің қолымызға Әуезов институтына барып жұмысқа тұруға жолдама жазып берді. Министрліктен шыққан бойы бәріміз Әуезов институтына келдік. Тұрсекен бізді институт директорының кабинетіне бастап кірді. Институттың директоры Әди Шәріпов еңбек демалысынан әне-міне келеді деп отырған сәт екен. Бізді Зәки Ахметұлы Ахметов қабылдады. Зәки Ахметұлының кітаптарын, жогары оқу орындарының филология факультеттерінің студенттеріне арналған «Өлең сөздің теориясы» деген окулығын оқығанымыз, атын, атағын естігеніміз болмаса, өзімен бұған дейін жүзбе-жұз кездеспегенбіз. Сыпайы, жүзі ашық, жайдары кісі екен. Тұр-түсінен де, сөйлеуінен де зиялыштық лебі еседі. Біздің қолымыздағы жолдамамызға қарап, кадр беліміне біздің бәрімізді де жұмысқа алу туралы бұйрық дайындауға ұтсырма берді, қыркүйектің бірінші күнінен қалмай жұмысқа кірсіуімізді, келген бойда институт директоры Әди Шәріповтің алдында болуымызды ескертті. Зәки Ахметұлымен біз осылай таныстык.

Кейін білдік, Зәки Ахметұлының өзі де жас кезінде ұстаздарының жақсылығын көріп жетіліпті. Әсіреле, бізге сабак берген, ақыл айтқан қарт профессор, қазақ әдебиеттануының асыл бәйтерегі Бейсембай Кенжебаевтың жақсылығын көп көріпті. Бейсекеннің ықыласы ауған адамның жақсы адам екенине алаңсыз сендік. Бейсекене деген құрметтіміз Зәки Ахметұлына да лайықты болар деп сезіндік. Екінші жагынан, Зәкеннің бізге деген жылы көзқарасынан, ағалық ізетінен ол кісінің біздің университетімізге, өзі оқыған, тәлім-тәрбие алған білім ордасына, оның ұстаздарына деген ерекше ілтифатын анғарғандай болдық.

Кісінің өзінің өмір жолында бағыт берген, көмек көрсеткен, жақсылық жасаған адамдардың қадірі мен қасиетін білуі - білімнің асылы. Оны өзі біліп қана қоймай, өзі мен өзгелердің игілігіне асыру - кіслік кемелдіктен. Зәки Ахметұлы – ғылыми шығармашылық және ұстаздық қызыметтеп өткізген өмірінде білімнің асылын тапқан, кіслік кемелдікке жеткен қазақ зиялыштарының алдыңғы легіндегі азамат еді.

Жастың алдында неше түрлі тандау түрады. Мысалы, Абайдың «Масғұт» поэмасындағы Масғұттың алдындағы үш түсті алма – үш түрлі тандау. Ағын тандаса, ақылы жаннан асады; сарыны тандаса, дәулеті судай тасады; қызылын тандаса, әйел затында одан қашар жан болмайды. Зәки Ахметұлы Абайдың поэмасындағы үш түрлі тандауға негізделген сюжеттік желінің И. Тургеневтің «Шығыс анызы» («Восточная легенда») шығармасына да арқау болғанына назар аударды. Өмір жолына түскен жастың алдынан үш түрлі тандау шығатыны қазақ ауыз әдебиеті үлгілерінде ежелден бар. Әр тандау әр түрлі мақсатқа жеткізеді: бірі - байлыққа, бірі - билікке, енді бірі - ай десе аузы бар, күн десе көзі бар асыл жарға. Өмір жолына жана түскен жас үшін бұл үшеуінің бірін тандау қынын. Өйткені жас адамға осы үшеуі бірдей керек. Зәки Ахметұлы осы тандаулардың бәрінің де маңызды, бәрінің де қымбат екенин сипаттай отырып, олардың қайсысын тандау қажеттігі айналасында халықтың дәстүрлі дүниетанымының, дәстүрлі көзқарасының ерекшеліктері барын аңдатады.

Сонымен қатар галым Абайдың поэмасындағы таңдауда айрықша сипат барын және оның терең негізінде жеке-дара, белгілі дәрежеде автобиографиялық мән жатқанын, өмірдің шындық болмысы бейнеленетінін көрсетеді [1]. Галым осы пікірі арқылы Абайдың шығармасындағы таңдаудан ақынның шындық болмысқа деген авторлық көзқарасы анғарылатынын сездіргендей болған. Сонымен бірге осы пікірде галымның өзінің де Абайдың таңдауына қатысы, эстетикалық бағасы көрініс тапқан еді. Осы жайды тіршілік философиясының қеңістігіне шығара қалған жағдайда, кезінде Зекенін алдында да түрлі таңдау тұрғандай болады.

Өнер туындысындағы таңдау бейнелі. Өмірдегі таңдау затты. Екі қеңістіктегі осы таңдауларға ортақ ерекше шарт бар: кісі нені таңдаса да бір-ак рет және бір-ак нәрсені таңдайды. Екі рет немесе екі нәрсені таңдау өнер туындысында да, өмір жолында да мүмкін емес. Өмірінің басында таңдал алған жолымен келе жатқан жанның орта жолдан кейін қайтып, басқа жолды таңдау мүмкіндігі тағдыр тақтасына жазылмаған. Сондықтан өмір жолының басындағы таңдаудың жауапкершілігі үлкен.

Өмір жолы тар соқпак, бір иген жақ,
Іілтіп екі басын ұстаған хак.
Имек жолда тиянақ, тегістік жок,
Құлап кетпе, тұра шық, көзіңе бак [2, 224], -

дегенде, Абай осы жауапкершілікті мегзеп айтып отырғанға ұксайды. Зәки Ахметұлының таңдауы айрықша болды: білім, ғылым жолын таңдады. Бұл жол байлыққа да, билікке де, түрге де, түске де тәүелсіз болды, ізгіліктің жолы болды. Білім мен ғылымды - азық, ізгілікті серік еткендіктен, Зекен «тиянақ, тегістік жок», «имек жолда» дүниеге бой алдырмады, аяғын шалдырмады, «құлап кетпей», «көзіне бағып, «тура шықты». Бұл онай емес еді. Бұдан ізгіліктің шырқау биігіне жетуді мұрат тұтқан және сол іздеген мұратына жеткен жанғана тұра шығуға тиіс еді. Анығын Алла біледі, менің түсінігімде Зәки Ахметұлы өмірдің «тар соқпак», «бір иген жақ» секілді жолына ізгі тілекпен түсіп, одан ізгі қалпында тұра шықты.

Зекен ғылым есігін өлең туралы ойларымен ашып [3], өлең туралы толғаныстарымен жапты [4]. Алғашқы іргелі еңбегінде Абайдың өлендерін тапты, соңғы еңбегінде Абайдың ақындық әлемінің жарығын жақты. Бұл екі ортада қазақ өлеңінің құрылышын жүйелеп, өлең теориясын [5-8] жасады. М. Әуезовтің «Абай жолы» роман-эпопеясының жазылу тарихы мен поэтикасын зерттеп [9-10], әуезовтану ғылыми, қазақ романының теориясын жаңа ғылыми қағидалармен, жаңа теориялық тұжырымдармен байытты, қазақ әдебиетінің көркемдік дәстүрлері мен заманауи даму заңдылықтарын саралады [11], әдебиеттің тарихы мен теориясын зерттеудің, теориялық ұғымдар жүйесін қалыптастырудың әдіснамалық негізін қалады.

Галым зерттеулерінің бәрі іргелі болмысымен ерекшеленеді. Сейте тұра зерттеушінің әрбір теориялық қағидасы нақты талдаулар мен пайымдауларға негізделеді. Әр ғылыми мәселе, құбылыс, зерттеу нысаны өзінің даму өзегінде, өзіндік қозғалыс өрісінде, тұтасқан күйінде әрі құрамадас бөліктерінің өзара табиғи байланыстары мен қарама-қарсылықтары жүйесінде зерттеледі. Зерттеу барысында қол жеткен нақты ғылыми нәтижелер теориялық саралалар мен жинақтаулар үдерісінен өтіп, тұтас құбылыстың жалқы және жалпы қасиеттеріне тән ортақ һәм дара ерекшеліктердің заңдылықтары анықталады. Осы ғылыми нәтижелердің әрқайсысы әдебиеттану ғылыминың дамуына жаңа серпін берген, әдеби-теориялық ойды биік белеске котерген іргелі жетістік, ірі табыс еді.

Зәки Ахметұлының еңбектерінде нақты кезенің, нақты аумактың, нақты тұлғаның нақты шығармалары нақты талдаулар арқылы пайымдалып, көркем әдебиеттің жалпы теориялық мәселелері туралы ғылыми және практикалық маңызы үлкен ойлар, қағидалар, идеялар тұжырымдалды. Осы ойлар мен қағидалар, идеялар ғұлама галымның өлең сездің құрылышы, жазушы еңбегінің психологиясы мен поэтикасы туралы эстетикалық теориясына ұласты. Бұл теорияның ғылыми маңызы күні бүгінге дейін жоғары. Ал шындығын айттар болсақ, кейінгі әдеби-теориялық ой Зәкем мен Зекем қалыптастырған биіктегі табан тіреп тұра алмай, кері лықсыды. Зәки Ахметұлы мен Зейнолла Қабдолұлы XX ғасырдың екінші жартысында қара терін ағызып жүріп бір адым алға жылжытқан әдебиет теориясы бүгінгі әдеби-теориялық ойдан көш ілгері алда, оқшау тұрғандай көрінеді.

Зәки Ахметұлы Зейнолла Қабдоловтың ұсынысымен әл-Фараби атындағы Қазак ұлттық университеттегінде филология факультетінің студенттеріне арнап арнаулы курстар оқыды, ғылыми зерттеулер жүргізді, диссертациялық кеңестердің жұмыстарына қатысты. Мен үшін Зәкемнің осы жұмыстарының берінің де пайдасы болды. Әсіресе, М. Әуезовтің «Абай жолы» роман-эпопеясының жазылу тарихы мен поэтикасы туралы іргелі зерттеу еңбегінің әдіснамалық жүйесін пайымдаудың

жеп көмегі тиді. Бұл еңбектің әдіснамалық негізі бірден көзге түсіп тұрмады. Тәжірибе көрсеткендей, іргелі зерттеулердегі талдаулар мен жинақтаулар, қағидалар мен тұжырымдар көзге көрініп, көнілге қонып тұрғанмен, солардың берінің асыл өзегі, тұпкі негізі қызметтің атқаратын әдіснаманы, методологияны тану онай емес. Мен соны тануға талап қылым, қанша ізденгеніммен, Зәкемнің ғылыми шығармашылығының әдіснамалық негізін, методологиясын жете білдім деп айта алмаймын. Зәкемнің ғылыми шығармашылығының әдіснамалық негізі терең, көп деңгейлі. Оған әркім өзінің ойы мен бойына қарай ғана бойлай алмақ. Мен де сөйттім. Әйтсе де Зәкемнің сөзі мен баяндамалары да, монографиялық зерттеулері де, ақыл-кенестері де менің ғылыми-шығармашылық қызметтіңде игілікті болғанын, елі де игілікті болып келе жатқанын айтуды өзіме парыз санаймын.

1992 жылы докторлық диссертация қорғады. Ғылыми кенесшім - Зекен, академик Зейнолла Қабдолов. Диссертация бойынша ресми төрешілерді белгілеу барысында Зекен екі төрешіні өзінің қалауы бойынша ұсынатынын, үшінші төрешіні менің таңдауым бойынша ұсынатынын айтты. Зекен бірінші төреші етіп академик Зәки Ахметовті ұсынды. Зекемнің ұсынысы туралы менің ойымдағыдан болды. Менің диссертациялық жұмысымның теориялық бағыты мен әдіснамалық жүйесі «Абай жолы» роман-эпопеясының жазылу тарихы мен поэтикасы туралы Зәки Ахметұлының монографиялық зерттеуімен негіздес болатын.

Диссертациялық кенес мәжілісінде Зәкем бас төреші болып сөйлемді. Диссертациялық кенестің төрағасы - академик Тұрсынбек Кәкішұлы. Төрешілердің сөзінің толық айтылуын қадагалаушы - осы кісі. Зәкемнің саралтамасын тыңдал отырмын. Қоңілім орнында. Бір уақытта Зәкем диссертацияда «Абай жолындағы» Тогжанның портретіне қатысты айтылатын пікіріме арнайы қоңіл аударды. Жүргім луппілдеп қоя берді. Бойжеткен сұлу қыздың портретін жасауда екі үлгіні катар алғып, салыстырған болатынмын. Оның бірі - Абайдың үлгісі. Екіншісі - М. Өуезовтің үлгісі. Онымен қоймай Абайдың «Қактаған ақ күмістей» өлеңінде сұлу қыздың портретін жасаудағы тәсілі туралы М. Өуезовтің: «...сұлудың сырт көркімен қатар сезімін, ақыл-мінезін, адамдық ішкі дүниесін беруді ақын ескермейді. Паспорттық сипаттау жасайды», - деген пікірін де айта келіп, Тогжанның портретін жасауда жазушының дара шығып, үлкен шеберлік үлгісін көрсеткеніне тоқталған едім. Ойланбай да қалмай, ақылға салып қарағанда, М. Өуезовтің портрет жасау өнеріне негіз болған бір арнаның Абайдан бастау алатының анғартқым келген. Бұл алда тұрған ғылыми міндеттін бір қырын танытуға тиісті еді. Зәкем менің осы пікірімнің сұлу қыздың портретін жасаудағы Абайдың үлгісіне қатысты жағын қолдамайтынын білдірді. Өзім де өз бастан «осы пікірім қалай болар екен» дегендегей күдіе едім, Зәкемнің ескертуі қоңілімді шайдай ашты. Ішімнен өзіме-өзім: «Абайдың «қактаған ақ күмістей кен маңдайлы» сұлу қызы түгіл, «шоқпардай кекілі бар қамыс құлақ» аты туралы да абайлап сөйлеу керек», - дедім.

Зәкемнің сөзі менің қоңілімнің бір түкпірінде бұғып жатқан ойды ояты: Абайды тек тану, тани білу керек.

Біраз жылдардан кейін Абайдың шығармашылығы бойынша менің ғылыми жетекшілігіммен бір диссертация қорғалатын болды. Диссиденттің дайындығы жоғары, ойы ұшқыр болатын. Сол шәкіртім бір күні Абайдың «Өлсе өлер табиғат, адам өлмес» өлеңіндегі «мені» деген бір сөзге қатысты пікірін айтты:

«Мені» мен «менікі»нің айрылғанын
«Өлді» деп ат қойыпты өңкей білмес.

Диссиденттің ойын айтып келіп, «мені» сөзінің дұрыс жазылмай тұрғанын, бұл сөздің дұрысы «мен» болуы керектігіне тоқталды. Ойна қосымша негіз ретінде Абайдың екінші бір өлеңінен үзінді келтірді:

«Мен» өлмекке тағдыр жоқ әуел бастан,
«Менікі» өлсе өлсін, оған бекі.

Шәкірт дұрыс айтты. Мен де осылай ойлайтынмын. Пікірін ашық айта беруіне қарсы болмадым. Келісім осылай болған. Сол шәкіртім өзінің диссертациясының соңғы нұсқасында Абайдың «мені» сөзінің орнына «мен» деп жазған болып шықты:

«Мен» менен «менікі»нің айрылғанын...

Мұны диссертациялық кенестің мәжілісі болар алдында ғана білдім. Үндемедім. Абайдың өлеңдерінің қалыптасқан мәтініне өзгерту енгізуінің жолы мен жөні туралы айтып жатпадым. Бір гажабы, Зәкеннің назарынан осы бір кішкентай өзгерістің өзі де тыс қала алмапты. Бірақ бұл жайға байланысты Зәкен сөз сөйлеп, пікір білдіргенді артық көрді білем, диссертантқа сұрақ қоюмен шектелді.

Әл-Фараби атындағы Қазақ ұлттық университеті жаңындағы диссертациялық кенес, қазақ әдебиеті кафедрасы еліміздегі үлкен бір ғылыми мектептің қызметін аткарды. Әдебиеттану ғылымының әр саласы бойынша ғылым докторлары мен кандидаттарының жаңа буындары өніп, есті. Зәкем бір зерттеулердің маңызы мен мәніне көnlі толып, тебіренді, енді бір жұмыстардың мазмұнын олқысынды, ескертулерін айтты. Соның бәрінде де әр диссертацияның аргы жағынан адамды, маманды көрді. Кейде үлкен мамандарымыздың өзі қайсыбір жас ізденушілердің жұмыстарын қатты сынап тастап жүрді. Сондайда Зәкем өзінің ойын айналасындағыларға сыйайы түрде жеткізетін: жұмыстың жақсы жазылмауы оны жазған зерттеушінің жақсы болмауынан емес. Жаман ғалым болмайды. Жақсы жаза алмайтын ғалым болады...

Өлең құрылышының жүйесін, өлшемі мен мелшерін Зәкенше төрөн зерттеген ғұлама қазақ әдебиеттануында жоқ. Соған орай өмірде әлдебір нәрсенің өлшемі немесе мелшері туралы сөз бола қалғанда, үлкен-кішіміздің ешқайсысы Зәкеннен асып сөз айтпайтын. Бір жолы кафедрадағы әңгімедүкен үстінде екі құрдас кісінің бірі екіншісіне өзінің қанша ақыл айтса да, оның ақылды бола алмағаны жайында әзіл айтты. Қалыптасқан ахуал аясында екеуінің әзілі жарасып тұрды. Сонда Зәкен олардың жарасқан әзілін мынадай түрде қолдаганы бар: *ақылды болудың өлшемі мен мелшері болатыны сияқты ақыл алу мен ақыл берудің де өлшемі мен мелшері болу керек*. Әзілдесіп отырған екі кісі жарқырап мәз-мейрам болып қалды. Олармен бірге кафедра түгел мәз болып, Зәкеннің табан астында тауып айтқан сөзін сүйсініп жатты.

Кафедра мәжілістерінің бірінде баспаға ұсынылған монографияда жаңа терминдер көп қолданылғаны туралы ескерту жасалды. Біреулер жаңа терминдердің көптігін және жаңадан қолданылғанын зерттеу енбектің ғылыми жаңалығы қатарында көрсетуге тырысты. Пікірталастың аяғын әдебиеттану терминдерінің ғылыми негізін жасаған Зәкем түйді: *қалыптасқан ғылым саласында бар ғалым жиылып немесе бір ғалым бас болып бір жаңа терминді ғылыми айналысқа түсірсе, онда ол ғылымның дамуына қызмет етеді. Ал егер қалаптасқан ғылым саласында әр ғалым бір жаңа терминді ғылыми айналысқа түсіретін болса, онда ғылымның негізі жойылады*.

Зәки Ахметұлы, Зейнолла Қабдолұлы, Тұрсынбек Қекішұлы Қырғыз Республикасы Ұлттық ғылым академиясы жаңында құрылған еларалық мәртебедегі диссертациялық кенеске мүше бола жүріп, қырғыз әдебиеттанушыларының үлкен бір буынын даярлауға енбек сінірді. Кейінрек бұл кісілер өздерінің қатарына мені қости. Біраздан соң өздері кенес құрамынан шықты да, орындарын кейінгі жастарға берді. Ондағы ойлары қазақ-қырғыз әдебиеттанушыларының шығармашылық ынтымақтастыры мен достық қарым-қатынастарының өздерінен кейін де жалғаса беруі еді. Ұш ағам да қырғыз ғұламаларының ортасында аса қадірлі, сыйлы болды. Өздері де қырғыз ғалымдарына үлкен құрмет көрсетер еді, олардың ғылыми зерттеулерінің теориялық нәтижелерін қырғыздан артық білмесе, кем білмес еді. Енді зәуеде бір жол түсіп бара қалсак, қырғыз бауырларымыз ол күндерді, Зәкем мен Зәкемді тебірене еске алады, Тұрсекене дүғай-дүғай сәлем айтады.

Диссертациялық кенес мәжілісінің, жас мамандардың диссертация қоргауының жауапкершілігі жоғары, өмірлік маңызы үлкен. Оны кенес мүшелерінің бәрі бір адамдай сезінді деп айту артық болар. Зәки Ахметұлы ғылыми-педагогикалық кадр даярлау ісіне, жас ғалымдардың ғылыми шығармашылық қабілеттерін дамытуға, ғылыми ойлау кеңістігін қалыптастыруға, диссертациялық зерттеулердің ғылыми маңызына, ғылыми қорда бар теориялық қағидалар жүйесінің баюы мен нығаюына соншалықты үлкен жауапкершілікпен қарады. Жоғарыдағы сияқты нәзік арқаулы оқигалардың айналасында Зәкемнің ғылым мен білімге адалдығының, қоғам алдындағы адамгершілік келбетінің, ұлт әдебиеті мен мәдениетінің жас мамандарына деген қамкорлығының естен кетпес ерекше жарығы барын бір мен емес, басқалар да білер-ау деп ойлаймын.

Бүгінде ғылым мен білімді сырттай басқарамын, сыртта жүріп ұйымдастырамын, сыртта тұрып дамытамын деушилердің қарасы көбейіп келеді. Бірақ бір нәрсенің басы ашық: ғылым мен білімді алыс қашықтықтан да, биіктен де, теменнен де ұйымдастыру, басқару, дамыту мүмкін емес. Ғылым мен білімді сол ғылым мен білімнің ішінде жүріп қана ұйымдастыруға, басқаруға, сейтіп дамытуға болады. Ғылым мен білім әлемінің асыл ақиқаты - осы. Зәки Ахметұлы ғылым мен білім әлемінің асыл ақиқатын өмір бойы құрметтеп, ардак тұтып өтті. Ол ғылым мен білімді оның ішінде жүріп, оның ыстығына күйіп, сұғына тоңып жүріп ұйымдастырды, басқарды және дамытты.

Галым адамның жаңа жетістіктерге жетуінің, жаңалық ашуының маңызы үлкен. Бірақ ғылыми зерттеу жүргізушілердің бәрі жаңалақ аша бермейді. Әдебиеттануда жаңалық ашуға нағыз ғұлама жанның ғана қолы жетеді. Ал нағыз ғұлама галым ғылымда жаңалық ашып қана қоймайды, сонымен қатар ол ғылым жолын таңдаған адамның көзін ашады, содан соң оның жолын ашады, сейтіп өзінің айналасын ғылыми ортага айналдырады. Ғұламаның ғылымға сіңірген еңбегі сонда ғана жанады. Зәки Ахметұлы қазақ ғылымы мен білімінің дамуына өлшеусіз зор еңбек сіңірді: ғылымда жаңалық ашты, ғылым жолын таңдаған жастардың көзі мен жолын ашты, еңбегі жанды, қазақ әдебиеттану ғылымында жаңа ғылыми орта қалыптастыруды, ол органдық райы тамаша болды.

Университет аудиториясына Серік Кирабаев, Тұрсынбек Кәкішев, Темірбек Қожакеев, Зейнолла Қабдолов, Зәки Ахметов секілді ғұламалардың әрқайсысы өз оргасының райымен келіп бас қосқанда, олардың өзара және басқалармен қарым-қатынасынан айнала нұрланып, жақсылықтың, кісліктің, ізгіліктің «алтын күрегі» есіп тұратын. Осы органдың осы райын, айналасына асыл нұрын таратып, жаңағанның жаңын жадыратып, адамшылық гүлін жайнататын киелі қасиетін дәл сипаттайтын сезді қалай тапсам екен деп ойга қалғаным, ойланғаным бар. Ақыры «Мениң университетім» деген атауға токтадым. Менің ардақты агаларымның әрқайсысы өз оргасының райымен келіп бас қосқанда, олардың өзара және басқалармен қарым-қатынасынан таралатын асыл нұр мен жаңағанның жаңын жадыратып, адамшылық гүлін жайнататын киелі қасиетті осылай атағанды дұрыс көрдім.

Академик Зәки Ахметұлы Ахметов табиғатында асыл нұры, киелі қасиеті бар, өмірінің гибраты мол, шығармашылық еңбегінің, ғылыми-педагогикалық қызметінің әлеуметтік маңызы зор аса ірі ғұлама еди.

Әдебиеттер тізімі

1. Ахметов З.А. «Восточная легенда» Тургенева и «Масгуд» Абая Кунанбаева // Тургеневский сборник. Материалы к полному собранию сочинений и писем И.С. Тургенева. Л., 1967. III. С. 163-165.<http://abai-inst.kz/rus/?p=280#more-280>
2. Абай (Ибраһим) Құнанбаев. Шығармаларының екі томдық толық жинағы. I том. Алматы, 1977.
3. Ахметов З.А. Лермонтов и Абай. Дис. ...к.ф.н. – Л., 1951.
4. Ахметов З.А. Абайдың ақындық әлемі. – Алматы, 1995.
5. Ахметов З.А. Казахское стихосложение (Проблемы развития стиха в дореволюционной и современной поэзии). - Алма-Ата, 1964.
6. Ахметов З.А. О языке казахской поэзии. - Алма-Ата, 1970.
7. Ахметов З.А. Өлең сөздің теориясы. - Алматы, 1973.
8. Ахметов З.А. Основы теории казахского стиха. – Алматы, 2002.
9. Ахметов З.А. Поэтика эпопеи «Путь Абая» в свете истории ее создания. – Алма-Ата, 1984.
10. Ахметов З.А. Роман-эпопея Мухтара Ауэзова. – Алматы, 1997.
11. Ахметов З.А. Современное развитие и традиции казахской литературы. – Алма-Ата, 1978.
12. Ахметов З.А. Поэзия шыны – даналық. - Астана, 2002.